

皇朝經世文統編



皇朝經世文統編卷十七

地輿部二 各國志

中亞細亞地圖考

中亞細亞之地至遼闊也蒙古滿洲日本高麗在其東安南緬甸印度在其南土耳其阿拉比亞在其西俄羅斯在其北如人之肩背股肱斬然截去只存大腹膨膨然又如巨靈揮斧東畫天山西盡黑海北截阿爾台山南斷恒河以成中亞細亞之世界若以度數論之起中國北京經西二十五度止八十度東西計長七千五百里起緯北二十度止五十二度南北計闊六千五百里按圖中所有諸國部其東境若蒙古之科布多若新疆之南北路其南境若後藏若葱嶺之加濕彌羅若印度之北界若阿富汗若俾路芝北境若俄屬游牧諸回部若基發若阿霸科爾諸處其西境若俄土之界若波斯諸處此總括輿地而言之也若衡量權力其權均力敵者有三大國中國而外曰俄曰英不啻歐羅巴之有德俄英法與意六大國各不相下其力皆足幹旋時事丹荷瑞比自鄧無幾土地不足以自存奉大國之令惟謹會盟征伐必以師從亦亞細亞之日本高麗安南緬甸比也中國與俄英之邊界交錯於中亞細亞如風水與石相搏必致相激過此數十年恐疆場之間難免多事況中國近歲用兵西鄙規復新疆諸城英俄共爭土國之政勢亦相逼皆有戒心釀變更速中國與俄英事關疆界間有一國處乎局外者惟英俄爭衡小亞細亞無與於中國俄人睥睨黑龍江無與於英人此外則壤錯犬牙遇事則牽連而及其隙不必果自我開也即與屬部構兵措置之間殊多阻滯如中國克復喀什噶爾而議索伊犁於俄是已按兩國此間之界俄人以意為之畫黃色綫以為識別竟將中國所轄天山北路伊犁等處暨土爾扈特游牧之區闌入境內計據東西九百餘里南北四百五十里當咸豐十年十月初二日恭邸與俄使伊格那督夫所立續增條約云西疆未定之界此後應順山嶺沿大河之流以及中國常駐卡倫為界又載自雍正八年所立沙賓達巴哈界碑之末起往西直至齊桑淖爾湖云云核對俄人所用法文作往西南並無直字字樣圖中所繪黃綫亦向西南斜行想係漢文誤刊至所載自此往西南順天山之特穆爾圖淖爾南至浩罕邊境為界云云乃查洋文則云自此往特穆爾圖淖爾南面之騰格里山亦名乞里吉思思特阿拉淘山又名天山南路順此山以抵浩罕之界並無西南字樣按騰格里山即天山之別名列嶺重重升高橫覽如波之疊必須確指某帶之某山斯為有據不得渾之曰騰格里也况所言阿拉淘山近在特穆爾圖淖爾湖之濱而所作黃色界綫距阿拉淘山相去二百餘里自相矛盾大率類此若就順山嶺大河

暨常駐卡倫為界之言指其地而賣之則自齋桑淖爾湖南至塔爾巴哈台山所點之虛綫迤東之處長約三百里闊約一百五十里皆應附入中國版籍又自賽里木泊所繪黃綫之界忽折向東據理則仍向西南至特穆爾圖淖爾南面之阿拉陶山沿其虛綫以向西南如是則伊犁亦在疆域之內無俟煩言而俄人不欲舉地來歸忽東其界遂使嚴疆赫赫淪於異域然而前約具在何難執聞與爭又按浩罕當恭邸與俄使修約時自為一部迨光緒二年俄人乘其內亂以兵取之定其地為省易其名曰弗爾干距喀什噶爾西境二百餘里商旅取道是間越葱嶺以達喀什噶爾亦往來之孔道也今俄滅浩罕之師久見告矣則前約以浩罕為界之言尚須更定他如新疆之西南境葱嶺之閒有屬中國之回部曰塞勒庫爾扼新疆印度之衝近日新報謠傳俄人將以兵取之果爾則新印門戶之筦掌自俄人既司出納之權兼徵商貨之稅英商坐困俄享其成隣之厚我之薄也當西疆未復時英人曾與喀什商議定通商約以絨呢易其羊毛運販之路則由塞勒庫爾而葱嶺而和闐而葉爾羌互市有年而俄人不知也後以俄商運呢銷路日絀疑而察之盡得其實故欲取塞勒庫爾截其商路而以重稅要之如是則英不克與俄爭中亞細亞通商之利而俄與中國商路縱橫四通八達其孔道之最著者曰阿克蘇曰葉爾羌曰烏魯木齊曰巴里坤曰塔爾巴哈台曰科布多暨烏里雅蘇台以及車克圖通庫倫之路而黑龍江愛根諸處商貨尤輻輳焉又按印度之西北有國曰加濕彌羅介乎新印之間迤南至尼婆羅西界雪嶺連綿八百餘里為英專隸之區與中國接壤順塞得勒止河澗之流以達西藏之馬拍穆達賴南過雪嶺七八百里至尼婆羅國亦名巴布勒國向為中國貢獻之邦歲久不至近聞復請入貢殆威德所布足以畏懷之歟又尼婆羅國之東界有地專隸於英曰昔吉穆與中國一徑相通長僅百餘里過此則入蒲曇國境為雪嶺之南麓北連西藏其國有英官為監與尼婆羅同夫英人久得印度虎視西藏而遲至數十年不出雷池半步者以雪嶺之阻天為之限且倔強之國錯出其間也

英之控馭印度也逞其兵威重徵賦稅印之君若臣畏之奉命惟謹然非心服也如巨盜入富人室珠玉金帛任其攫取莫敢發聲以其刃加於頸也英人慮及於此恐兵臨西藏腹地空虛列國諸君長必以兵躡其後而掣之肘非惟西藏不可得即印度亦不能有其人知印人非不欲甘心於英以洩隱恨故嘗遣辯士陰說之英覺之伺察甚嚴防禦加密益置西藏於度外絕口不談而俄人轉不能忘情於印度以阿富汗國實為印度之屏蔽俄陰結之使附於已撤英人之藩而英不悟也當同治八年英外部商諸俄駐英使凡兩國屬地在亞細亞者應議定分界之地免疆場之爭駐英俄使回

報本國隨奉俄相加支可夫復書示英外部而以阿富汗為界之言卒無成議蓋俄欲以阿富汗為界英則欲界以阿霸  
科爾按阿克蘇河之北為阿霸科爾國附於俄南為阿富汗國附於英英欲界河北俄欲界河南皆進尺得尺之謀也况  
阿富汗近已左袒於俄有疑英之心隨事易生嫌隙恐開兵端已有數事令俄阿富汗族散居印度西北之開拍爾嶺者  
不服其王屢入印度境內為盜英人出兵攻之遂稍侵阿富汗之邊地所以構隙者一也前五六年阿富汗王色耳阿里  
欲立愛子阿伯都拉為世子請於英弗之許且欲立其當立者曰雅庫伯坎以杜日後之爭蓋有鑑於前王督斯特馬合  
麥德也當阿富汗前王督斯特馬合麥德臨歿時囑其諸子曰色耳阿里為吾所立汝輩翊戴之當如吾在時取俱唯  
乃骨肉未寒起而爭位者比比矣今色耳阿里不懲前失踵行含嫡立愛之舉倘英人因而立之是召亂也堅持不許遂  
致失歡所以構隙者二也前王之世嘗以餉匱為憂英國不時濟之又贈以軍火器械倚以自強近則逐漸不予所以構  
隙者三也又當諸子爭立時英人作壁上觀色耳阿里曰英與吾父為友國予蒙難而不一救是何怨也抱憾至今所以  
構隙者四也又二年前英人築砲台城於俾路芝境上適當阿富汗之邊界英以其地為通印度之鎖鑰建此則英掌其  
筦意無他也而阿富汗王疑其逼已將有兼并之謀所以構隙者五也有此五事則英阿之交愈離是速其合於俄也刻  
聞英國傳檄阿富汗諭其以事俄之心事英否則願與之會獵境上敢請師期英俄之爭阿富汗其決於此舉乎英於斯  
時如莫敢與較或拱手讓俄則俄之威令得以越阿富汗而加於印度矣英失印度之權不過歐西一小國耳何能抗俄  
以衛土土耳其之地跨越歐亞兩洲今為俄所控割地請成所屬亞細亞之卡爾斯阿達亨巴統三城已為俄有失其險  
塞不克與英連兵斷俄人裏海之路且巴統地臨黑海水陸交衝商貨絡繹轉運入波斯者不絕於途土權其稅為歲入  
之大宗茲既改屬俄亦輸俄俄駐波斯之使與波斯王議開鐵路自俄屬南考克斯山起造以達特赫蘭俄當得地之初  
即議築路通商足徵急於功利有如性急人餐熟粥不饑其冷攬以著而吞之也又擬此路造成更展而東以達阿富汗  
西北境之赫拉特再東以達卡布爾過此則與印度已成之路合而為一矣又按同治十二年波斯國王游歷歐洲止於  
倫敦有承造鐵路寓英之德人名雷特爾者與波王立造路之約迨波王歸國俄人沮之事遂寢蓋不欲英擅其權也近  
聞英人擬自地中海營造鐵路沿土屬之雙河以達波斯而印度而中國如是則通商之路更捷於紅海矣雙河之役將  
次興築數年之後約可告成第恐俄人所築南考克斯山鐵路先期成事則此路胥歸無用中亞細亞通商之利舍俄其  
誰歸乎考之中亞細亞地形類盆孟之底四周皆山中為平原水盡歸之蓋上古之巨浸也厥後最低之處為泊為湖為



海而平原出焉餘潦受日之熱水皆化氣鹹質合於泥沙土瘠不毛遂成戈壁近山之地人墾為田稍遠為游牧所居水草是依即史冊所稱行國行部也分隸於中國俄羅斯俄人欲變荒寂之所為繁富之區大營鐵路以及通商造成之路以越烏拉山去今二年雖與土構兵餉絀民疲而此役不息距中國之塔爾巴哈台城僅四十五百里仿美國造路之限日一英里較之至遲數年即可相通至於俄人電綫之設北至庫克圖西至伊犁東至黑龍江幾遍於中亞細亞既捷其路復迅其音舉措倉皇不可終日豈有所迫而然耶何若是之亟也

### 論亞細亞各國

亞細亞一洲北盡北冰海東盡東海南盡南洋及印度海北盡諸回部及黑海以五大洲計此洲最廣蓋亞洲居全陸地三分之一也中國在其東南連絡十餘省土產富饒人民以四萬萬計為亞洲最大之國其西北則為俄之高加索西北利二省然俄地在歐洲為多茲不具論其次則為日本國有四大島曰長崎對馬四國九州近頗習西法枝藝精巧貿易繁盛其餘琉球小呂宋越南緬甸暹羅俾路芝阿富汗波斯孟加拉亞刺伯皆不之逮蓋小呂宋日漸窮蹙琉球則屬於日本越南暹羅則見欺於佛朗機其餘諸國微弱居多良可慨也然近來暹羅王精明強幹振奮有為思行自主不甘受法人之辱於是國中政令莫不維新且親出游歷以資考察歐洲各國無不欽之敬之法國反為之屏蔽與暹立約永不侵犯並不許他國侵犯由是觀之不亦差強人意耶然吾昨觀日本今觀暹羅而不能不有慨於中國也日本為亞洲之島國未甚強大近效泰西之法曾幾何時富強立至我中國反受其害暹羅雖不及日本而其志則可嘉也中國地勢廣大受歐洲諸國之毒及氣吞聲絕無振奮中東事後頗知變法而成效尚未可觀兵事廢弛海軍單弱遂為外人輕視德佔膠州鐵路旅順歐氣日熾無可挽回即啗以重利允息兵爭而可弭一時不可弭異日可飽一國而不可以饜眾邦羣相效尤詎有已時耶雖然歐洲各國勢均力敵無釁可乘故每垂涎於亞洲俄佔旅順及高麗固中國之不利亦日人之不利也識者謂甲午一役日人最為失計蓋同處亞洲而互相操戈唇齒之間尚多未合日人近亦知之故膠州事起頗悔前事甚欲與中國聯絡竊以為立國之道不可徒恃外人即與日聯絡亦當加意自強而後可也嗟乎亞洲自皇古以來為文教之地然文教過盛則武事畧虧武事既虧則國勢較弱歐洲不及亞細亞四分之一當虞夏之際僅聚於地中海西隅滋生既久新聞榛莽其人皆日事干戈講求強富故亞洲不能與之爭衡然威極必衰物極必反即以歐洲論秦漢之時羅馬幾成一統後乃微弱嘉慶之時法國幾成一統未幾日耳曼自今今日之亞洲日本既務自強倘中國加以

奮勉文事之外齊以武備亦何嘗不可與歐洲抗衡哉

### 歐洲各國開闢非洲考

按三百年前歐洲船隻初不甚大故出海外地者亦不甚遠然講輿地家常言地是一球若向西行將來必東至印度於是常思至印度限於路遠殊覺悵甚嗣又得一捷徑欲至印度方佳乃直向西行之忽至一地方以為印度也乃不意竟為亞美利加洲較歐洲地大五倍土膏而腴地廣而人稀雖有野人亦無多焉歐洲人乃漸有遷於是者後為各國所開闢盡而野人亦漸皆向化矣前二百年歐洲人總欲探盡地球乃又至一地名奧大利亞洲較歐洲地有三分之二其地亦有野人不甚多歐洲人亦有遷於此者據地開墾後歐洲以此為發遣罪人之區其地出金礦開此礦時歐洲人來此作工者亦不少其地盡為英人所有外又有亞非利加一洲數千年前雖為歐人所共知然因其地近赤道瘴癘甚虐非壯實之人不敢往是以未敢深入此地較歐洲有三四倍之大人數大約有歐洲三分之二近數年內始深入探盡其地內中多黑人向未受化殺人放火擄人為奴以此為業良善者常受其虐殘暴不可言狀前百年上下有荷蘭及英人命將出師先往亞非利加南隅闢地漸成小國野人亦漸受教化守規矩近十四年內比國憫非洲內地之受殘暴擄掠也乃於非洲中地闢而立國名孔戈設塾以化導之又近七年內有英法德葡萄牙意大利西班牙諸國闢地甚多至去年幾將非洲膏腴闢之殆盡所餘者多半沙漠大山不生草木之地耳然諸國各據地於此苟無和約以為限制亦亂階也今按英法以前據地界限至今有更改之處乃各派官員前往其地勘定界限又立約凡教師至其地宣化彼此不相禁止而且宜保護焉又英德立和約由去年西歷七月始定兩國所據之地界限東南西北勘定甚細內中有一河道係兩國公用前比國立孔戈國時凡立埠口有若干不納稅之地今英德所定和約仍照此章定為制凡兩國埠口商人以前在此為商者仍照常為商毋得禁止又傳教人在其地傳教亦不可妄禁又有一地原回王所轄以後其地多半歸德少半歸英至是同王獻地於德德則估其值而償以銀屬英者仍歸英緣早年英有一海島名海利戈蘭近德之口岸德人欲之而未能至是德以非洲之回地屬英者業已償回人以銀而仍送還英英人遂以此島贈之他國立和約亦仿此由是亞非利加一洲盡為諸國所據矣其地所產之粗貨如牛羊羊毛之類盡發往歐洲製成精細之物又發回非洲售與其人所謂兩有益者非與又其人向受獷悍殘暴之酷自諸國據地開堂宣教漸化其兇悍之氣由是人咸沾教澤無復有殘害之風是諸國之大有益於非洲也今將各國所據之地數人數列于左按英所轄非洲之地大小十九處共二百

四十四萬餘英里每英方里合華里十方里人數大約有三十九兆之譜每兆百萬法人所轄非洲之地大小九處共二百七十八萬英方里人數大約廿二兆之譜德人所轄非洲之地大小四處共一百萬英方里人數大約五兆葡萄牙所轄非洲之地大小六處共九十萬英方里人數大約五兆餘比國所轄非洲之地孔戈國一處共八十二萬英方里人數約有十五兆之譜意大利所轄非洲之地止紅海南口以西一帶之地共三十一萬英方里人數約有五兆餘西班牙所轄非洲之地大小四處共二十四萬餘英方里人數約有四十四萬之譜共計非洲地為諸國所關即此數十年內已有十之七八矣然以上地數人數但即西國冊籍所載不過言其大概而已俟各國遣官勘定界限實數方確至去年各國立和約不許越境相侵佔各守各境相安而已由是觀之伊古以來關地如此之多而且速向未曾有苟非非洲內地之人愚魯粗悍無大知識何至如此一大洲盡為他人所關哉雖然其地之獷悍兇暴向未沾化自諸國據地以後設塾宣教使之漸知禮義又復教之製造使之共有衣食之益將來能養十人者皆可以養百人而無難焉是諸國教民養民之新法有不但益於己而且有益於非洲者亦匪淺鮮矣

### 與大里亞諸埠考

英屬奧大里亞北埠名撥打榮為近來新開之埠南埠相近雪梨為歷來久開之埠同屬於奧大里亞嘗聞諸西土言英國屬疆之最廣者為澳大里亞印度次之即兩境以相衡則印度之遜於澳也遠甚印度地處熱台物產繁盛居民解于力作游惰成風戶口雖繁而風土人情性情嗜欲與英人迥不相侔即使強以從同要亦難於持久澳則地處溫台與異中國歐洲兩境土苟為之勸農課士通商惠工迎其機而順導之釐其弊而逆制之日起有功固無難媲美英京亦且可抗衡上國查該境之南有三大省一曰南澳大里亞一曰奴騷斯威勒士一曰威克院里亞其奴騷斯威勒士通商之埠曰息的呢威克院里亞通商之埠曰墨勒伴估船鱗集物產屬臻現各省派員會議于息的呢聯為合約守望相助聲氣相通其商會中人訂約通商一體免征稅餉復以奴騷斯威勒士一省出產無多無所裨益議按年津貼六萬八千磅由南澳大里亞及威克院里亞兩省稅餉項下分撥訂約三年為期則該境之修好睦隣關痛癢而資贊助亦已漸臻上理惟聞通商之約未經請命于英且英國公司輪船運載貨客至彼例先停泊墨勒伴次乃駛往息的呢及墨勒伴各洋商議請徑泊該埠以小輪船分運于息的呢而息的呢商會中人又堅執成例以相抵因是略啟嫌隙故欲效美國之合從連橫叛英自立則事殊時異力固有所未逮勢亦有所不能第英人久道化成固無難出於印度之上吾故曰印度之遜

於奧大里亞也英人好勤道略廣拓屬疆闢草萊啟山林因地之宜興地之利教民成俗咸與為新將來諸屬疆之足稱首選者奧大里亞是也數十年後行將拭目俟之

### 越南國紀略

越南一名安南為古交趾國古所謂越裳貢雉即其地也其地多山山則層巒疊嶂而三峰為主山水則枕江環海而富良為要隘夷獠雜處椎髻漆齒跣足文身其人則賦性犷悍反覆無信而禮義之不知其俗則男女無別裸體同浴而康恥之不識爭奪兼併倖掠不忌敵兵至則遁而浮海敵兵退則登陸拒命漢晉以來雖稱內附然瘴鄉蠻俗與中華迥隔天淵大率十年一亂必數年而後平又必數年而後定張輔以十餘年勞費制設郡縣文武官僚輒以水土惡劣致多損折視為畏途旋又叛者相仍卒歸於夷參考前代皆外而不內惟山川與隸幅員形勢如道里之遠近水陸之分歧山川之險易戶口之多寡財賦之豐絀要不妨詳稽博考兼綜條貫以為採風之助籌道之備耳查安南幅員東西距一千七百六十里南北距二千八百里直達粵東之欽州是為水程西至雲南老撾宣慰司五百六十里北至廣西憑祥州五百里是為陸路由廣西而進出鎮南關一日至文淵州過諒山途出長慶府而達黎京由雲南而進出臨安府蒙自縣歷宣光富良二江而入黎京由廣東而進自欽州天津驛渡貓兒港至涌淪佛陶道經萬寧州逕抵黎京此道里之遠近水陸之分歧也國有鎮南關越二百里為鬼門關今更名畏天關關口僅容兩騎崇山峻嶺箐險溪深道路崎嶇最為險要黎京坐富良江之西後倚三峰山左為鞍子山右為傘圓山三山高巖疊霄而富良江江面遼闊隔岸不見人影周流環抱入海富良江之東北特諒江諒山以為要富良江之西北特宣江迤江以為險前明張輔進兵一出鎮南關至片站抵富良江北岸之嘉林州一出蒙自縣歷猛烈關由宣光江口至富良江會合此山川之形勢也國中殿宇廟宇始用陶瓦民居則編著為蓬創竹為棟楮其民數自前明張輔平定時計三百十二萬五百戶迄今四百餘年滋生日繁數無可稽矣然其地女多於男雖平民亦三妻四妾其戶口之大概如此安南地多山高田畝零星崎嶇瘠瘠者居多宜稻無麥各處輸賦所入僅足支本地兵餉野無蓋藏國少蓄積惟高平一府現開金礦每年收稅亦不過二百餘兩而別府又無藉可考其財賦之大略如此前明置交趾地設立十七府統四十七州一百五十四縣十衛十三所又改置十三路今輿籍內仍舊十三道而府則或由州改或由縣改共有五十三府二百一十四州縣而皆無城郭大率樹柵為衛植竹為藩其內外各官名色彷彿有明制度惟典兵則由太監出隊輒以象先以五色布為號幟號帶略綴薄鉄皮數片為甲乘不穿鞋袴出



兵時不另給餉由民間供給口糧此又於數端外爰及其設官分職備兵禦敵之舊章也至西貢以南近為法人設準通商互市較盛於前而風土人情無少差異此其大畧也

### 日本國緣起

日本古稱倭人顧亭林天下郡國利病書云倭人鄰三轉而國故名韓中倭後自惡其名更號日本其國在東海中平列三大島北曰對馬島與高麗南境相直一夜可達明季關白為亂者是也中曰長崎土較大與浙海普陀山相直內地商船互市於此南曰薩嶋馬與浙之溫台相直人強健刀最利兼產馬明嘉靖年間搜閩浙之倭寇薩嶋馬也三島之外小島甚多王居長崎之東北地名彌耶穀譯曰京為畿五曰山城曰大河曰河內曰攝津曰和泉共統五十三郡為道七曰東海統一百十六郡曰南海統四十八郡曰西海統九十三郡曰東山統一百二十二郡曰北陸統三十郡曰山陽統六十九郡曰山陰統五十二郡曰多藝曰對馬共統二郡地皆依水附嶼郡之大者不過中國一村落國王一姓歷世不易初號天御中主居築紫宮其子號天村雲尊自號皆以尊為號傳世三十二至彥瀲尊第四子號神武天皇徙大和州禮原宮傳至守平天皇凡四十一世復徙都山城兩漢時始通中國魏晉以後得五經佛教於中土於是沙門之教盛行唐貞觀間嘗遣使往諭宋初遣國僧奝然浮海貢獻太宗賜紫衣厚存撫之其國官皆世祿仍漢制皆稱刺史二千石文字同中國讀以倭音歷代以來不爭王而爭上將軍故上將軍第宅時更新王而王無易姓立法嚴人少鬥爭犯法者輒走山谷自殺呼童僕鳴掌則應日竟不聞人聲好佛教祖先得香花佳果必供佛或走獻祖墳俗尚潔街衢時時掃滌男女皆大領潤袖女加長以曳地繪染花卉裊裊帛幅着短襪曳絛履男髡鬚而雞頂額留髮至腦後潤寸餘縮為髻髮長者翦之女多美髮日洗滌薰以楠沈前後挽髻插玳瑁簪其男女眉目肌理髮鬚華土信東方秀氣之所鍾也長崎與普陀東西對峙水程四十更六十里為一更橫洋窮渡風浪極險廈門至長崎水程七十二更由台灣雞籠山之北渡米糖洋查覽洋北風從五島門進南風從天堂門進前明中葉大西洋之葡萄牙嘗欲據海口又以洋教誘其土人日本與之戰荷蘭以兵船助日本葡萄牙遁去故其國與通商者惟中國與荷蘭而已乾隆間始有英俄輪船往來其地立約通商今王國號明治崇尚西法機器製造輪路電線悉倣行之近則服式正朔一遵西人制度數十年之舊制為之一變焉

### 日本疆域考

日本在中國東南去臺灣二千里據四大島及諸小島以為國地勢自西而東首南島次中島西島又次北島當緯線赤

道北三十度至三十五六度之間經線 京師偏東十一度至二十七度北接俄羅斯之細比利亞東南枕太平洋西與朝鮮滿洲隔海相望綿亘三千餘里寬僅百里或二三百里統計面積得二萬五千九百二十方里其形如巨鯨矯首橫臥海中掉尾而曝腮所分八道山陰山陽其首也南海為其領附近之隱岐別出則鬣也周防海口介乎其間猶若口然而紀伊淡路附於中兩島之旁恰似魚之曝腮畿內東海北陸三道乃其身也熊登佐渡出脊間又似鼓翅也若安房側時伊豆橫伸是非足而何全國舊分一畿七道明治之初攘滅蝦夷乃更為八其間最大者曰中島一畿五道在馬居中者為畿內畿內西北臨北海者為山陰與山陰相表裏而依內海者為山陽又北海上當畿內北者為東山為北陸其與畿內並而濱東海者即為東海是六道者相為聯屬無間隔者也南島之地突出海中舊名四國今曰南海其地在畿內之西南西島地並中島占號九州現為西海西海之北是名北海為蝦夷故地即北島也此外小島若小笠原隱岐對馬千島四者尚可即縣其餘密若繁星小於拳石無關輕重可弗載紀焉傳言倭在東海其國百餘乃閱彼史王居之外畿內一道僅分五國南海道分六國北陸道分七國山陰山陽兩道皆分八國西海道分九國北海道分十一國東山道分十三國東海最多亦祇十五國蓋以壹岐對馬二島國小笠原樺太琉球三附國總計蓋八十七國云若天府縣郡之制則府以五居巖邑通都大城而立縣因政事便宜而劃郡以地理田畝利便而分大小統轄無定在也如東京府轄武藏五國而三國屬於鄰縣大坂府轄攝津七國京都府轄山城八國而丹波三國乃跨兩道縣之分雖多一國為一縣然亦有一國分二縣數縣者一縣合二三國者郡之境視縣為小每國必有十數若二三郡者不多見也郡之屬有所謂村者每郡數亦不等以境地甚小隨意區劃無容心焉故三府六十縣六百三十一郡之下至有村七萬一千二百一十六之多也 注按日本經緯而度雖如上所云然洲外諸島有遠出其限者如小笠原之北已逾緯線二十六度其東經線亦過三度至樺太十島則更在緯線北五十四度經線東十一度之外矣近夷琉球強入版圖其地在緯線北二十四度經線西一十七度贏縮懸殊萬難折中蓋日本之為國實大小島嶼之攸賴其間或遠或近或有可憑恃或無足重輕不一其地記者祇就其大者要者測之餘可無煩表誌故其度數之不勻有如此云

### 日本地勢軍實攷

日本立國東瀛與我中國雖有一海之隔然同在亞西亞洲境內故風俗文字間有相同者其全國分度東西自東經線一百二十四度四十五分至一百五十六度三十分南北自北緯線二十四度六分至五十度十六分地屬畿內者五

一山城二攝津三大和四河內五河泉分為道者八曰西海道在畿內道迤西大隅薩摩日向肥前肥後豐前豐後筑前筑後豐前對馬十一國屬焉西南曰南海道伊豫土佐河波讚岐淡路伊紀六國屬焉西北為山陰道石見出雲伯耆因幡但馬丹波丹後隱岐八國屬焉西為山陽道長門周防安藝備前備中備後美作播磨八國屬焉其東為東海道伊賀伊勢尾張志摩三河遠江駿河伊豆甲斐相模武藏上總下總常陸安房十五國屬焉北為北陸道若狹越前越中越後加賀能登佐渡七國屬焉東北曰東山道近江飛騨美濃信濃上野下野巖代磐城羽前羽後陸前陸中陸奥十三國屬焉又東北一大島曰北海道渡島後志膽振石狩十島北見日高勝釧路根室天鹽十一國屬焉總而計之為府者三一東京府一京都府一大阪府為縣者四十一與各國互市之處八為長崎為神戶為大坂為橫濱為築地為箱館為新潟為夷港此形勢之大略也至於軍實陸軍分設六鎮第一東京鎮統三師分置武藏第二仙臺城鎮統二師分置陸前第三名古屋鎮統二師分置尾張第四大坂鎮統三師分置攝津第五廣島城鎮統二師分置安藝第六熊本城鎮統二師分置肥後共計將校等官三千三百十六員統領官吏一千四十員候補生徒職工十七萬二千九百二十四人傭役二千一百二十四名砲兵二千四百名海軍分為五區第一橫須賀港區分置相模第二吳港區分置安藝第三佐世保港區分置肥前第四五十分設之初未定區地共計將官等校九千九十三員統領官吏六百三十一員候補生徒下士二千二百六十五人海軍兵卒六千四百八十二名傭役四百五十五名以上皆常備兵至臨期徵調之兵勇有三十萬八千七百二十三名第一豫備徵兵有九千八百五十九名第二豫備徵兵有六萬一千七百五十九名此皆不在額兵之內砲台東京府東海道武藏國荏原郡有六座大坂府畿內攝津國西成郡天保山有一座兵庫縣畿內攝津國武庫郡兵庫港有二座長崎縣西海道肥前國西彼杵郡長崎港有六座鹿兒島縣西海道薩摩國鹿兒島有六座北海道廳北海道渡島道龜田郡函館有六座高知縣南海道土佐國高岡郡野見港有一座和歌山縣南海道伊紀國海部郡和歌港有一座兵庫縣南海道波路國津名郡由良港有一座長崎縣西海道對馬國對馬島長崎縣西海道肥前國南松浦郡五島長崎縣西海道肥前國東彼杵郡以上三處其數未知師船三十四號曰扶桑艦曰金剛艦曰比叡艦曰日進艦曰天城艦曰磐城艦曰孟春艦曰第二丁卯艦曰雷電艦曰龍驤艦曰清輝艦曰迅鯨艦曰淺間艦曰筑波艦曰富士山艦曰千代田形艦曰石川丸艦曰鳳翔艦曰東艦曰青日艦曰蒼龍艦曰海門艦曰筑紫艦曰天龍艦曰葛城艦曰大和艦曰武藏艦曰浪速艦曰高千穗艦曰高雄艦曰愛宕艦曰摩耶艦曰島海艦曰赤城艦其中扶桑比叡金剛龍驤東五號為

鐵甲餘俱本質製成此外又有大雷艇一號小雷艇六號嘗謂日本之改效西法可謂餘力不遺然據其大要言之不外於商務軍務二者今者彼國水軍陸軍諸學校皆有我中國輿圖時時指示生徒使之熟習我中國其可不詳加考核使熟於彼國情形乎惟此篇譯自和文難免不稍有訛悞且其整頓諸務日異日新苟刻舟膠柱以求之難免貽彼國以笑柄有志者時加詳攷則得之矣若謂此篇即可為指南之針則我豈敢

### 英國緣起

英吉利為歐羅巴強大之國地本三島孤懸大西洋海迤東兩島相連南曰英倫北曰蘇格蘭兩島南北約二十餘里東西瀾處五六百里狹處三四百里迤西別有一島曰阿爾蘭南北約七八百里東西約五六百里英倫南境與荷蘭法蘭西皆相近舟行半日可達距法尤近海濱狹處止六七十里兩岸可以相望其地古時為塞爾達土番部落後為北狄峨特族所據漢宣帝時鳳三年五馬大將愷撒略定西北諸番渡海平英倫建為別部屬意大里者數百年至今猶有羅馬城遺址前五代時羅馬亂俄特族自倫敦人據英倫後為蘇格蘭之斯各多比德斯兩部所攻孤弱不能自立求援於安各羅安各羅者亦峨特種裔居撒遜比利時界用兵素強而偏仄無立國地既為卑勒敦人所邀則大喜求取渡海破走蘇格蘭兩部因脅降卑勒敦人陳後主元年據英倫立國共分為七部如列國小侯時相攻伐有厄伯德者娶法蘭西王之女女奉洋教招教師來其國為制禮儀由是其國漸強唐德宗貞元十六年滅六部歸於一是時大尼國方劫掠海上突以兵船入英倫據都城英人以厚賂緩兵尋以計焚其船自是大尼寇抄不已居民逃竄田野荒蕪王子有亞腓烈者智畧過人幼時嘗兩赴羅馬與文士游方嗣王位而大尼以大眾來攻王乃偽為樂工抱琴造敵營請奏伎侑酒因得縱觀虛實進兵決戰破其連營是時法蘭西已陷北地大尼屢次侵擾王枕甲寢戈五十餘戰而外患平乃墾田勸農招徠商旅開學堂以譯異書立信約以弭盜賊境內大治王卒於唐昭宗年間嗣王孱弱大業遂衰先是英倫以尚洋教興久之教師擅大權王娶后教師禁不令同室王不聽教師却后以鉄烙毀其容尋斃之王嚙不能仇由是王僅守府國勢不振大尼復來侵擾許以歲賂始給銀洋一萬七千斤後增至二萬四千斤而兵不至宋真宗十九年大尼大舉來伐破倫敦都城遂兼英其王曰駕奴特立治粗有條理英人安之其子嗣位苛斂好兵先是英北族有酋曰威廉常仕法蘭西守西北大尼既滅英威廉欲圖興復請於羅馬教王教王以英土封之宋英宗治平年間威廉率舟師伐英大尼王禦之兵敗被殺威廉進攻據倫敦遂王英北族凌英民英民多反側王怒驅英民十萬眾於林中皆凍餓僵死以其田宅



賜北族既而悔恨卒王顯理第一嗣宋高宗二十七年王顯理第二立有智謀時洋教魁恭預國事王有所拔擢教魁輒阻撓之羣臣怒殺教魁王懼教王之加罪也自守齋拜其墓乃已附近有伊琳大洲王征服之其世子剛猛好戰欲伐居猶太之同回族先往聘修好歸途為他國所擄以金贖回後戰死其弟約翰嗣位性強狡好田獵百姓疾之又侮洋教師羅馬教王怒棄絕英良息禮拜閉殿堂廢其婚葬禁飲酒食肉雞鬚民皆怨恫咎王王不得已納盲教王由是權遂下移民自擇薦紳議政不復關白王憤甚欲誅諸紳諸紳欲招法蘭西世子為王會王歿華義都第三嗣立有權略平內難與法蘭西攝兵累年互有勝負其子嗣位權復為紳民所侵英有別部之酋忽起兵攻王奪其位明建文帝元帝國人立顯理第四募兵恢復滅僭位者國乃定顯理第五立法蘭西勝之顯理第六立年尚幼大臣攝政時王宗分二派一曰紅玫瑰派一曰白玫瑰派兩宗爭欲據王位自相屠殺國大亂者數十年藩屬皆叛明憲宗成化年間顯理第七嗣位削平內亂四境安王性機敏長於吏治稱為賢主顯理第八立性強傲尚豪華喜怒不常娶西班牙王女為后因助西班牙伐法蘭西后無子出之再娶少父己而失寵殺之再娶又殺之王有佞臣委以大權偶注意立賜死忠言至計如充耳四國皆稱為無道主先是日耳曼人路得者著書譯解西教旨人多信之王不謂然手著一書駁詰之王歿嗣王崇信西教寬惠愛民教士有法舉國囑囑望治立未幾卒其子馬和嗣位贅西班牙王子為婿禁西教國人不悅明嘉靖三十六年女主以利撒畢即位賢明知大體勤於政治英民頌之是時荷蘭不肯從洋教為西班牙所攻英女主以兵助荷蘭西班牙因移兵伐英師船泊英港忽大風激浪船觸礁石半沉壞英人以小舟圍而殲之片帆無返者國勢益振先是斯哥西亞別為一國元初英人取之明中葉斯哥西亞人布魯斯復自立為國有女曰馬理姿絕世初嫁法蘭西王為后法王早卒馬理歸母家父卒嗣王位選羣臣美丈夫為夫夫有別寵馬理妬之寢夜遣客殺夫焚宮以滅其迹而贅殺夫者為夫時國人已就尚西教而馬理仍執洋教又殺夫有邪行國人圍馬理將囚之越城而逃募兵決戰兵敗降於英英女王謂馬理犯倫掌亂下之獄馬理在獄十八年復與獄吏姦因逃去英人捕得之斬於市萬歷三十一年英女王卒無子斯哥西亞王熱給斯者女主之姻也英人奉以嗣王位斯哥西亞復與英合為一國熱給斯辯給有才好講禮制時洋教之徒結黨謀反害公會殿下藏入藥候王至將轟殺之會發覺悉誅死萬歷四十二年查理第一立性拗僻好戰押不恤民隱由是士民怨畔公會皆散稅餉無所出王將與法蘭西戰授甲無有應者師船未戰而退大清順治四年王募兵誅梗命者國人與王戰虜王弑之時有大紳負才望攝王政以定國自稱保護主申明法制參以變通英人稱便與西班牙荷蘭

戰皆勝之攝政數年倉庫充實乃致位於先王世子曰查理第二為人淫侈多內寵情於聽政常與荷蘭戰帥者國之名將入荷蘭內港燬其戰船王由此愈汰忽倫敦大火焚宮室民居殆盡已而瘟疫盛行死者相枕藉國勢頓衰其弟嗣位素習洋教強民相從民習西教久不肯變慮王之相難也渡海招荷蘭王為主荷蘭王率兵至王奔法蘭西康熙二十七年荷蘭王入倫敦即王位號曰威廉第三雄武有大略法度嚴明百司任職積粟如邱山蒐討軍實戢成勁旅由是威聲大振方欲席卷西土會豐疾疫無子時日耳曼之漢柳瓦王若耳治第一有賢聲康熙五十二年招若耳治第一來英奉以為王王初蒞英不諳其俗后為英故王之女習於英事相助為理民大和前王兩宗苗裔尚存起兵欲圖恢復王夷滅之是時英商船通行四海日益富強與法蘭西交兵屢戰勝王卒子若耳治第二立修法度別等咸定親疎平訟獄國稱大治伐西班牙獲全勝又伐法蘭西割其藩屬之在亞墨利加者乾隆二十三年若耳治第三立舉動好循禮法亦稱賢王先是前明中葉英人泛海覓新地得北亞墨加腓士徒國人寔其地日漸開墾遂成沃壤英人倚為外府後英國軍興連年徵稅餉於亞墨利加倍其常額亞墨利加人不能堪有華威頓者據地起兵英人以大軍攻之八年不克法蘭西與英世仇舉傾國之兵助華威頓英不能支乾隆四十七年與華威頓和聽其自立為米利堅國沃土盡為米利堅所割僅餘北境荒寒之上英國由是虛耗已而五印度貿易日盛英富厚過於昔時五印度者一名溫都斯坦乾隆中年東印度之孟加拉因虐英商英以大兵攻之滅孟加拉乘勝脅降東中南印度諸部設四大部麻喇甲息力諸者族皆歸統轄英人遍設埔頭帆檣雲集自貨流通富饒遂為西國之最嘉慶年間法蘭西拿破侖得國侵伐四鄰廢西班牙王而以其弟王西班牙故王求援於英英起兵伐法蘭西血戰累年嘉慶二十一年破法蘭西舟師於海峽以九萬人登陸進攻拿破侖率十萬眾禦之於高德爾樑約期大戰自昧爽至日暮鎗砲之聲震大地數十里烟氣迷漫法兵大潰英人乘勢逐北斬首二萬級擒拿破侖以歸流之荒島西班牙王復其故國由是英國威震西土王晚年得狂疾世子攝政王卒世子嗣位有賢聲早卒道光九年其弟嗣立曰威廉第四初為水師總統以厚德譽下不沽名譽及即位安民和眾不喜兵爭論者謂才能不越眾而德量有餘道光十八年四月卒無子有女不慧遺命立兄女維多利亞為王立時年十八贊日耳曼撒可堡侯世子博雅為婿即今在位之女也以中國紀年計之已五十七歲矣

### 論日本新得島嶼

今有人曰吾能不勞一卒不費一幣不折一鏃不遺一矢而席捲數百里或數千里之地聞者莫不駭然却走羣相斥其

妄而笑其愚蓋以土地至重得之甚難古今人爭城拓域有提數十萬之眾屢數百萬之饒攻取斗大一城曠日持久而莫之能克者夫席捲千里之地而曰卒不勞幣不費有是理乎豈知理之所無固為事之所有獨不聞日本之近事乎日人有須田竹二郎者商於石狩駕海船遭颶風吹至太平洋止於島間登岸視之樹木蒼翳四無人聲蓋荒壤也入林摘果實食之得不飢將行遂建旗島上歸告政府擬收入版圖前報言之纂詳余謂此固日人之故智有開必先鼻祖當推徐福何以言之在昔我中國始皇帝既能一海內晚年益驕縱欲求長生得以永保富貴也有徐福者自托於方士以神仙術于祖龍遊海上有三神山曰蓬萊曰方壺曰圓嶠遠隔瀛海舟行三年而可達上有不死藥得之則神仙可成富貴可保也始皇聞之喜從其請選良家子弟男男女女三千人賜黃金錦綺器物咸備數萬石而五之畜十頭而六之樓船簫鼓放洋而東遂不復還相傳既至長崎莫厥攸居男女偶焉五穀生焉六畜育焉土地日闢五穀日繁成市成都迄於漢魏列為貢獻之邦矣噫雄才遠略如徐福者何得以方士目之當秦之世不屑臣祖龍而又知中原有人未可與爭英雄無用武之地聊從海外而稱王其操心積慮固非流俗所能知也今者日本新開之島嶼以無心得之用情雖異其事則同然竹二郎其小焉者也徐福其遠焉者也獨不聞西班牙之於古巴乎考之古巴一島境表數千里物產豐阜西班牙人倚為外府近歲土酋倡亂戕殺富吏鎮兵單弱莫能防勦請兵於國乃刷勁兵十數萬跨海征之轉戰頻年始克戡定其亂夫一島之得失而爭以全力若有關於國勢之重輕者以泰西屬地惟此僅存視昔全盛時據有巴西北魯委斯瑞拉烏魯拐諸國之地採金銀以鑄錢設關市以征稅商船往來利盡四海盛衰強弱固有間矣原夫得地之始僅出於一人之臆度初非勞師糜餉以百戰取之也富有明中葉西班牙國為波旁朝有將軍某檄察地形以為泛海西行必得洲島請於國王舉朝大譁以為不可曰嘗聞海與天際波外無天安得有地王獨拒眾議而從其請遂載百二十日糧在船人役共一百四十名揚帆取道而進六旬而無所見取懼海闊天長沈迷不悟也請于將軍曰糧已半矣盍歸休將軍曰姑為我展三日程乎越三日眾又請將軍曰再為我展三日程乎如是者三而大海茫茫仍無所見眾皆拔刀而前摘冠而請曰即此迴帆已須忍十日飢而後生還可望倘鷁首仍西不復能事將軍請先入蛟龍之宮將軍曰嘻何至是耶試盡此一日程如無所見吾亦欲東耳是日晌午見飛鳥一行掠舟而西而西南諦視之翠羽朱喙蓋鸚鵡也將軍指以示眾曰不有陸地安有飛鳥盍尾之而行眾皆色喜急趣之將夕瞥見燈火漸近燦若繁星夜泊澳間黎明視之沿岸多漁家土人導之行里許市廛屋宇櫛比鱗次所市之物以及草木鳥獸較諸歐羅巴皆似是而非其地即今之古巴附近

之小島也距北亞美里加洲不過一日程倘不隨飛鳥改向而偏南則所得尚不止此將軍既得島嶼喜甚與土人言莫能通惟互相會意爰市其土產百貨而歸厥後遂遷民墾闢其地愈推愈廣以致富強管子曰地者本之政也不其然乎

### 論印度興衰並英人治理之始

印度又名溫都斯坦係亞細亞洲南境之半島有恒河一道與印度中國分隔自北緯七度二十七分至四十一度四十分京師西經二十四度六分至四十九度六分其地為三角形銳角在南底線在北其西海邊浸於印度洋中其東海邊為孟加拉海灣北以雪山為界即希瑪納雅山也自北至南長五千二百餘里自東至西其最寬處四十三百餘里其居民二百兆有奇其地可分為四截一為北印度一為南印度其中之地大半係昔時蒙古人所据一為北德干一為南德干是為南界盡頭處直至哥摩林內而錫蘭一島亦屬於南德干之內此半島之西南海邊俗稱馬拉巴東南海邊俗稱科羅滿秩耳江河之最大者一為恒河二為信地河此二河為其旁之支河匯合而成又有勃拉馬布特拉河其大幾與恒河相埒天時之寒暑依地形之高下而有分別但一離高山無處不熱終年惟有二種氣候乾燥與雨水雨水之時瀉如瀑布江中之水泛濫淹溢風之狂猛能拔老樹天氣大率清淑惟常有疫病最害人者莫如霍亂吐瀉地土之膏沃出產之蓄富非他處所可及礦產五金之類甚多金剛鑽之美麗甲於天下兇惡之獸及有毒之蟲亦麇聚於其間居民種類甚雜除印度人為土著外又有巫來由人蒙古人中華人該白爾人阿喇伯人土爾其人而近百年以內又增歐洲人其中以英人為最多各種人每各奉其教不相問聞語言之分別有二十種都城名加爾各答居民四十五萬人其中英人僅有四千如連城外民數總計之有八十三萬人此城係一極佳之海口地土依窪係淤泥所積大砲臺一座名福爾脫威廉耶蘇教士駐此城統轄印度教務獄訟有平反衙門又有英人喬叻斯所創亞洲博學會以刊布博議著名官私學塾亦皆有之孟加拉省之總督駐此城內其衙門頗壯觀瞻並有無數高堂大廈故俗稱之曰宮殿城貿易極大製造蕃旺此印度都城之情形也印度初有之史記全係臆造印人鋪張其來歷言過其寔細推其第一朝約在中華伏羲以前首創律例者名瑪奴其婆羅門教之來源亦古其佛教之始在周定王時當阿力山特王時希臘人始知印度之名自彼時起即有多人往印度遊歷阿力山特王收服本若部一分之地命彼羅司管理之後又有人名賽亂古司進攻印度直至恒河立通商之事隋文帝時有教士遊歷印度帶蠶種回國唐中宗時有回教王之提督名爪戴倍收服信地河兩岸之地唐德宗時回教人得印度之地於是西人更知印度之情形矣當時印度內有無數土酋分路其地其中最強



者係雷噶爾之土酋彼等為自王之國歷百有餘年古里特朝統轄印度以回教攝政嗣古里特朝以其位讓於阿富汗人西里斐斯此家初為蒙古王之附庸後又作帖木兒之附庸此朝至明永樂十一年滅絕印度一國竟為帖木兒子孫所得有名勃勃者擊敗阿富汗人立一蒙古之國幾全踞印度而有之但其國政暴虐國王懦弱各省督撫有大權又有僭號稱王者與之為敵所以其國漸衰我朝乾隆四年波斯人內弟爾屠戮得列部遂令蒙古一朝衰敗至不可救當明末至國初時有葡萄牙人及荷蘭人考察印度海濱而未嘗至其內地嘉慶初年法國總督蒲爾同餒及其弟澄累乘蒙古人之衰敗而分裂欲為法國開拓疆土但法政府令其辦事而不為之保護於是有英人聽候印度公司調度而有克里佛與浮倫罕司丁兩人掌握兵權取法王路易第十五所棄之地之事英人始在孟加拉作為立足之地收烏德之土酋作為附庸後設計取緊要之各城與法人戰伐賈索爾之王而克之至嘉慶二十二年英人幾統轄全印度或作為英國徑治之省或作為英國之附庸咸豐六年印度總督陶爾西肆其詐謀吞併烏德國加以他項欺壓令人憤怒之事至七年五月遂有印度土兵之變激成大亂佔路德列羅克拿二城為叛黨之根本重地八年英人截撤印度公司而以治理之權歸於英君主攻戰二年後英人卒能平其亂黨且能開拓疆土其管轄之權格外堅固得未曾有光緒三年春英人尊其君主曰五印度太后帝當是時英人在印度中國已得極大之利益即恒河之上流今之緬甸等處是也嗚呼觀此可知英人之志矣其初通商其繼經營其終蠶食而併吞之以致數千年之古國卒為英人所有此前車之鑒也可不懼哉

規印度以制英論

今天五印度為古天竺國一名身毒幅員廣闊地勢三角形每邊六千里其間大小數十國從古不相統一明初賽馬爾罕王諦母爾本元駙馬鐵木耳之後兼併西域諸回部遂南侵印度歸入版圖號曰大蒙古建都於中印度之德希城其國廣二萬里歲收賦稅二萬二千四百萬各國皆仰慕焉正德時有葡萄牙人初至西邊海隅貿易未幾荷蘭英吉利法即機西班牙等國之商就相往來於其間然蒙古王威德重人皆畏之其後諸子爭權內亂並起各部酋長乘間擾攘分崩離析國勢多衰乾隆二十年孟加拉土酋與法人密約將境內之英人囚之於獄概行禁錮英人死其大半既而欲復此仇調傾國之師使大將律記利夫將之馳入安額河遂獲全勝於是東印度各酋長望風歸復乘勝進取中南諸部乾隆三十年復叛盡殺英人英遣薩伊姑底攻復疆域嘉慶十年盡除法荷兩國之民旋駐印度之兵以據其地自是以